

Paonori Timotio ninshitërinso'

**Timotio yonquiaton,
nanan a'patërinso'**

1 ¹Ca Paonoco ninshitaranquën, ni'quë'. ¿Noya, ya'huaran? Noya canta' ya'huarahüë. Yosë nohuanton, Quisocristo acorinco nanamën a'china'huaso marë'. Yosë chachin anoyacancantërinpoa'. Oshanënpoa' inquitatonpoa', nicha'ërinpoa'. Quisocristo imatëhua', ina ninarëhua'. A'na tahuëri inápaquë quëpantarinpoa'. ²Timotionquën ninshitaranquën. A'chintëranquën ni'ton, Quisocristo natëton, ina imaran. Napoaton hui'nahuë pochachin ni'nänquën. Na'con nosororanquën. Tata Yosë inaora nohuanton, catahuainquën. Noya nosoroinquën. Nani tahuëri asanocancainquën. Quisocristonta' inapochachin catahuainquën. Inasáchin natërehua'.

Nonpin nanan a'china'piro'sa'

³I'hua Masitoníaquë yapa'patëra, sha'huitëranquën. “Ipoisquë ya'huëtaquë' pënëntamaso marë',” itëranquën. Iporanta' inachachin sha'huitëranquën. Inaquëranchin ya'huaton, pënëntáquë'. A'naquën nisha nisha nanan a'chinapi. Inapita sha'huitëquë' ama ina pochin a'chi'inasohüë'. ⁴Shimashonënpita iráca napopiso' yonquiápi. Inahuara yonquinëna quëraonta' nisha'huitopiso' yonquirápi. Ama huachi inapita yonquicaiso marëhuë' sha'huitëquë'. Ina pochin a'chinpachina', topinan quëran a'chinapi. Piyapi'sa' nisha nisha nonsapi. Co catahuapihuë' Yosë nohuitacaiso'.

Yosëichin natëhuatëhua', catahuarinpoa' noya noya imacaso marë'.

⁵No'tën nanansáchin imapatëhua', catahuarinpoa' noya ninosorocaso'. Noyápiachin cancantohuatëhua', co nisha nisha yonquiarihuahuë'. Ina quëran cancanënpoa quëran huarë' natëarihua'. Ina pochin cancantohuatëhua', noya nosoroarihua'. Ina Yosëso' nohuantërin. ⁶Nisha a'china'piro'saso nipirinhuë', co ina pochin yonquipihuë'. Yosë nohuantërinso' naniantatona', topinan quëran nonsapi. ⁷“Quiyaso' maistrocoi. Ya'ipi pënëntërinso' nitotërai,” topirinahuë', co no'tëquën nitotopihuë'. Chiníquën nonpirinahuë', co nitotopihuë'.

⁸Moisësë pënëntërinso' noya niponahuë', ma'marë chachinsona pënëntërinso' nitotatëhua', no'tëquën sha'huitacaso' ya'huërin. ⁹Noya nipsisopita co pënënacaso' ya'huërinhuë'. A'napitaso nipirinhuë' pënënacaso' ya'huërin. Co Yosë natëtonahuë', co insonta' yanatëpihuë'. Co natantonhuë' niconpi. Pa'pi co noyahuë' nipi, oshahuanpi. Yosënta' tëhuapi. Co ina chinotopihuë'. A'naquënso' pa'pina', a'shina' inapita co quë'yatonahuë', yatëpapi. A'naquëonta' tëpatopi. ¹⁰Nisha nisha nicacaiso' yonquipi. Sa'ina', so'ina' inapita ya'huëtaponaraihuë', monshihuanpi. Quëmapi capini, sanapi capini nisë'huapi. Piyapi'sa chachin ihuapipi pa'anacaiso marë'. Nonpintopi. “Tëhuëenchachin no'tëquën nonahuë,” taponaraihuë', nonpinpi. Yosëso' noya nicacaso' a'chintopirinpoahuë', co

nohuantopihuë! natëcaiso! Ina pochin nipisopita tëhuënchinso! pënënacaso! ya'huërin. ¹¹Yosë nanamënso! noya nóya. Ina quëran nicha'ërinpoa! “Ma noyacha Yosëso paya,” itërehua! Ina chachin acorinco nanamën sha'hui-ca'huaso marë!

Quisocristori catahuarinso!

¹²Ina marë! Sinioro Quisocristo achinicancaninco. “No'tëquën natëarincó,” ta'ton, acorinco a'china'huaso marë! Napoaton: “Yosparinquën Sinioro,” itërahuë. ¹³Iraca caso! nisha cancantërahuë. Quisocristo pinorahuë. Imarinsopita no'huito, aparisitërahuë. Quisocristoso nipirinhüë! nosororinco. Co nohuitatohüë! co natëyatërarahuë! ni'ton, nosororinco. ¹⁴Sinioro chachin inaora nohuanton, nosoroatonco, na'con catahuarinco. Catahuahuachincora, “Quisocristoíchin anoyacancantarinco,” ta'to, ina natërahuë. Ina imato, nosororahuë canta! ¹⁵No'tëquën sha'huitaranquëma! Ya'ipi piyapi'sa! natëina! Quisocristo isoro'paquë o'marin oshahuano'sa! anoyacancantacaso marë! Caso! na'con na'con oshahuanpirahuë! anoyacancantërinco. ¹⁶Yosë nosororinco. Hua'qui co noyahuë! nipirahuë! nosororinco. A'napitanta! natëcaiso marë! napotërinco. “Paono pa'pi co noyahuë! nipirinhüë! hua'qui ahuantaton, Quisocristori nosororin. Nosoroarincó canta!” ta'tona!, natëtapí. Natëtohuachina!, Yosë nohuitatona!, noya nanpiapi. A'na tahuërinta! inápaquë nanpimiatapi. ¹⁷Napoaton Yosëfchin natëahua! Nani tahuëriya: “¡Ma noyacha Yosëso paya!” itahua! Inaso! co onporonta! ta'huantaponhuë! Co quënanpirëhuahuë! hua'anëntomiatërinpoa! Inafchin chinotacaso! ya'huërin. Ama onporonta! ina naniantahuasohüë! Amen.

¹⁸Hui'nahuë pochin api, ni'nanquën. I'hua chachin ansiano'sa! Yosë nontatona!, acorinënquën Yosë nanamën a'chinamaso marë! Naporo! Yosëri anitotërinso! sha'huitatënën, pënëninënquën. “Yosë nohuanton, api, nanamën noya a'chinaran. Ina marë! acorinquën. Parisitaponahuë!, catahuarinquën. Napoaton Quisoso a'chininso chachin a'chinquë!” itërinënquën. Iporanta! inachachin pënënanarquën. Quisoso nanamën chachin a'chinquë! sopai minsëcaso marë! Tëhuëenchachin sopai yacanapirinpoahuë!, Quisocristo catahuarinpoa! minsëcaso marë! ¹⁹Inasáchin natëton, pënëntëquë! Quisocristo nohuantërinso'ráchin yonquiaton, noya niquë! Noyápiachin cancantaton, piyapi'sa! a'chintëquë! A'naquënso nipirinhüë! cancanëna quëran noya nicacaiso! nitotopirinahuë!, co yanatëpihuë! Nani Yosë naniantatona!, co huachi yonquipihuë! Quisocristo a'poatona!, co huachi imapihuë! ²⁰A'naso! Iminio itopi. A'nanta! Aricantëro itopi. I'hua niyontonpatëira, inapita chiníquën pënënahüë. “Quisocristo nanan quëtërinco ni'ton, ama huachi Tata Yosë a'paiinquëmasohüë! Sata-nasë natërama! ni'ton, parisitamaso! ya'huërin,” itërahuë. Ama huachi Yosë pinocaiso! marëhuë! chiníquën pënënahüë. “Oshaquëran co noyahuë! yonquipisopita naniantatona!, Yosë pochin cancantantapona! nimara,” ta'to napotërahuë.

Yosë nontacaso! ya'huërinso!

2 ¹Ya'ipi piyapi marë! Yosë nontacaso! ya'huërin. Niyontonpatama!, na'con nontoco! Yosëri catahuain. “A'paniarinpoa! mini,” ta'toma!: “Yosparinquën Sinioro,” itoco! Ina'ton pënënanarquëma! ²Copirnoros'a marë!

Yosë nontoco' noya hua'anëntacaiso marë'. Ya'ipi hua'ano'sa marë' Yosë nontoco' noya nicacaiso marë'. Noya hua'an nipachin, co aquëtë' piyapi'sa' nino'huiapihuë'. Sano yonquiatëhua', noya ya'huarihua'. Ina quëran Yosë yonquiatëhua', noya nisarihua'. ³Ina pochin Yosë nontacaso' nóya. Inaso' nicha'ërinpoa'. Nontohuatëhua', noya nataninpoa'. ⁴Ya'ipi piyapi'sa' nicha'ë-caso' nohuantërin. Nanamën no'tëquën nitochina'. ⁵Yosëichin chinotacaso' ya'huërin. Oshahuanëhua' ni'ton, inimicotopirëhuahuë', Quisocriso nanan anoyatërinpoa'. Inasáchin Yosë anohuitërinpoa'. Inaso' Yosë niponahuë', piyapi chachin nasitimarin. ⁶Quisocriso inaora nohuanton, nicha'ëinpoaso marë' chiminin. Chiminaton, oshanënpoa' inquitërinpoa'. Tahuëri nanihuachina', Yosë yanicha'ërinpoaso' anitotërinpoa'. ⁷Ina nanan sha'huica'huaso marë' Yosë acorinco. A'parinco nisha piyapi'sa' a'chinta'huaso marë'. "Yosë no'tëquën nontërinpoa'. Ina natëco'," itërahuë. Tëhuëchachin no'tëquën nonahuë, co nonpinahuë'.

⁸Napoaton nani parti niyontonpachina', quëmapi'sa' Yosë nonchina', ténahuë. Ama no'huichinasohuë'. Ama nisha nisha ninonchinasohuë'. Noyápiachin cancantatona', Yosë nonchina'. ⁹Sanapi'santa' noya niina'. A'naquën sanapi'sa' nitapacaisoráchin yonquipi. Na'con na'con yanco nitonpomototopi, notohuaro' miyo pë'pëpi, nisha nisha a'sontanpapi. Pa'ton nininsopita a'mocaiso' pa'yatopi. Ainën tapacaisoráchin yonquipi. Yosë imarinsopitaso nipirinhüë', ama inasáchin yonquiatonahuë', sano yonqui'ina'. Ama piyapi'sari pa'yatacaiso marëáchin nitapainasohuë'. ¹⁰A'mopiso' ama na'con na'con yonqui'inasohuë'. Noya nicacaiso' na'con

na'con yonqui'ina'. Yosë imapi ni'ton, inaíchin chinochina'. ¹¹Yosë nanamën a'chinpachina', sanapi'sa' ta'tatona', noya nataina'. Natanahuatona', noya natëina'. ¹²Niyontonpatama', quëmapi'sa' pënëchina'. Sanapi'saso nipirinhüë', co pënëntacaso' ya'huërinhuë'. Ama quëmapi'sa' camaiinasohuë', ténahuë caso'. Ta'tatona' nataina'. ¹³Atan'ton Yosëri ninin. Ina quëran Ipa ninin Atan catahuacaso marë'. ¹⁴Napora-huaton, sanapi'ton co noyahuë' ninin. Sopairi nonpintohuachina, ina natëton oshahuanin. Co Atan nonpintërinhuë'. ¹⁵Sanapi'saso nipirinhüë' hua'huinpita noya aso'sohuachina', Yosëri noya ni'sarin. "Yosë catahuarinco," ta'tona', imamiachina'. Piyapi'sa' noya nosoro'ina'. Noyasáchin ni'ina'. Sano yonqui'ina'. Inapohuachina', nicha'ësarín.

Ansiano'sa' acocaso' ya'huërinso'

3 ¹No'tëquën sha'huitaranquën. Ansiano yaya'conpachina', noya yonquiapi. Ansiano'sa' tēhuëchachin catahuarinënpoa'. ²Napoaton yaya'conpachina', nóya nipsisopitaráchin ya'coina'. Ama piyapi'sari pinocaiso marëhuë' noyasáchin niina'. A'na sa'ináchin ya'huëchina'. Co monshihuanacaiso' ya'huërinhuë'. Sano yonqui'ina'. Ama nisha nisha yonqui'inasohuë'. Ya'ipi cancanëna quëran imaina'. Ni'toro'sa' huë'pachina', noya nonchina', o'shichina'. A'chinacaiso' noya nitochina'. ³Ama no'piinasohuë'. Ama yaahuëchinasohuë'. Sano yonqui'ina'. Ama yano'huichinasohuë'. Ama coriquiráchin cancanchinasohuë'. ⁴Ya'ipi pëinënquë ya'huëpisopita noya a'paiatona', a'chinchina'. Hui'ninpita noya pëinëina' no'tëquën natëcaiso marë'. Sanoanan quëran pënënpachina',

noya natërapí. Pa'pina' noya ni'sapi.
⁵Co hui'ninpita tëranta' pënënpachin-
 huë', a'napitarinta co yanatëponhuë'.
 Napoaton co nanitërinhuë Yosë imapi-
 sopita noya catahuacaso'. ⁶Hua'qui
 imapisopitaráchin ansiano ya'coina'.
 Nasha imarinsó' ya'conpachin, co noya-
 huë' yonquiamara: “Caso' ansianoco
 ni'ton, noya noyaco,” tapon nimara
 yonquinënguë. Iráca sopai hua'an
 ina pochin yonquihuachina, Yosëri
 ana'intërin. Ni'cona inapochachin
 ana'intochinquëma'. ⁷Noya nininso-
 ráchin ya'coina'. Noya nipachina', co
 imapisopitarihuënta' noya ni'sapi:
 “Inaso' noya quëmapí,” tosapi. Co
 noyahuë' nicaponahuë', ya'conpachin,
 sopai hua'ani nonpintaton, minsëarin.
 Piyapi'sarinta' tëhuapi.

**Tiacono'sa' acocaso'
 ya'huërinso'**

⁸Ansiano'sa' catahuarinsopitaso'
 tiacono'sa' topi. Inapitanta' natëtono'sa'
 niina'. No'tëquënáchin noina'. Ama
 nisha nisha noinasohuë'. Ama no'pii-
 nasohuë'. Ama nonpinatona', coriqui
 canainasohuë'. ⁹Yosë anitotërinpoaso'
 nóya nitochina'. Nitotatona', cancänä
 quëran huarë' natëina'. Inapohuachina',
 noyápiachin cancantapi. ¹⁰Ama a'naroá-
 chin aya'concosohuë'. Pi'pian tënitoma',
 ni'co'. Noya nipachina', ya'coina'.
¹¹Tiaconaro'santa' natëtono'sa' niina'.
 Ama ma'tona ma'tona noinasohuë'.
 Ama pinochinasohuë'. Ama no'piina-
 sohuë'. Noyasáchin niina'. ¹²Tiacono'-
 saso', a'naíchin sa'ina' ya'huëchina'.
 Hui'ninpita noya pënëina' no'tëquë
 natëcaiso marë'. Ya'ipi pëinënguë ya'huë-
 pisopita noya a'paitona', a'chinchina'.
 Ina pochin cancantërinsoptarachin
 ya'coina'. ¹³Tiacono'sa' noya nipachina',
 imapisopitari noya ni'sapi. Noya Yosë

marë' sacatohuachina', chini chiniquë
 cancantapi. Quisocristo noya natëtona',
 nanamën a'chinapi.

**Yosë huëntonënguë
 ya'conpisopita**

¹⁴⁻¹⁵Na'con yonquiatënguë api, nica-
 ponquë yapa'sarahuë. “Co hua'quiya
 quëranhuë' pa'sarahuë topirahuë'.
 Hua'qui quëran a'na' pa'samarahuë,”
 ta'to, iso quirica ninshitaranquë
 pënëna'huanquënsó marë'. Yosë huën-
 tonënguë ya'conpatëhua', onpopinso-
 nicacaso' sha'huitaranquë. Yosëso'
 nanpiárin. Canpoarë chachin ya'huë-
 rarín. Nanamën no'tëquë anitotërin-
 poa'. Imarëhuasopita niyontonpatëhua',
 no'tëquë a'chinaríhua'. ¹⁶Iráca co Yosë
 nohuitopirëhuahuë', iporaso' Quiso-
 cristo anohuitërinpoa': “Ma noyacha
 inaso paya,” tënëhua'.

Yosë hui'nin isoro'paquë
 o'maton, piyapi chachin
 nasitimarin.

Ispirito Santo chachin anito-
 tërinpoa' Yosë hui'nin
 nininso'.

Nanpiantahuachina, anquëniro'-
 sarinta' quënanpi.

Imapisopitari ya'ipi parti
 paatona', nanamën sha'hui-
 ra'piapi.

Na'a piyapi'sa' natëpi.

Iporaso' Yosë'pa' noya
 ya'huërin. Inatohua' Yosëri
 quëpantarín.

Yosë nanamën a'porapiso'

4 ¹Tëhuëenchachin Ispirito Santo
 ninoton, a'ninquëchin sha'hui-
 tërinpoa': “A'na tahuëri a'naquë
 piyapi'sa' Yosë nanamën a'porapi.
 Sopai natëtona', nonpin nanan a'chin-
 pachina', imasapi. Ayaro' tahuëri

ya'caritohuachin, naporapi," ténin.
²Naporo' nonpina'piro'sa' ya'hua-
 pona' piyapi'sa' nonpintacaiso marë'.
 "Quiyanta' Yosë imarai," topirinahuë',
 co no'tëquën nonsapihuë'. Nitotapo-
 naraihuë', co cancanhuanhuë' pochin
 nicatona', co natëtochináchinhuë'
 cancantapi. Hua'qui' sopai natëtona',
 co huachi nanitapihuë' Yosë natëcaiso'.
 Inapitaso' nisha a'chinapi. ³"Ama sanapi
 macosohuë'. Nisha nisha cosharo' a'poco
 huachi," tosapi. Napopirinahuë', Yosë
 ya'ipi cosharo' ninin capacaso marë'.
 Nanamën nitotatëhua', Yosë natëhua-
 tëhua', co a'poarihuahuë'. "Yosparinquën,
 Siniro," itatëhua', caparihua'. ⁴Ya'ipi
 ma'sha Yosëri ninin. Napoaton nóya.
 Co manta' a'pocaso' ya'huërinhuë'.
 "Yosparinquën, Siniro," itatëhua', ya'i-
 piya noya caparihua'. ⁵Yosë quiricanën
 yonquiatëhua', Yosë nontohuatëhua',
 noya capacaso', ténin Yosë.

**Quisocriso marë' noya
 sacatacaso' ya'huërin**

⁶Nani pënënanquën. Ina nanan
 a'chinpatan, noya nisaran. Quiso-
 criso noya ni'sarinquën. Cosharo'
 achinirinposo pochin Yosë nanamën
 natëhuatan, achinicancanarinquën.
 No'tëquën a'chintërainquën ni'ton,
 noya imasaran.

⁷Nonpin nanano'saso nipirinhuë'
 tananpitëquë'. Inahuara yonquinëna
 quëran naporapi ni'ton, tananpitëquë'.
 Inapitaso' topinan quëran a'chinapi.
 Quëmaso nipirinhuë' nani tahuëri
 yonquiquë' Yosë noya imacaso marë'.
⁸Nani tahuëriya sacatohuatëhuara,
 chinipirëhuahuë', noya noya Yosë
 imacaso' yonquihuatëhua', achinicancan-
 inpoa'. Achinicancanpachinpoa',
 noya noya nisarëhua', tënahuë. Noya
 noya imapatëhua', isoro'paquë noya

nanpiarëhua'. A'na tahuërinta' Yosë'pa'
 nanpimiatarihua'. ⁹Caso' no'tëquën
 pënëntërahuë', ya'ipi piyapi'sa' natëina'.
¹⁰Ina marë' paatëhua', Yosë nanamën
 sha'huirárëhua'. Parisitarihuarahuë',
 a'chinárëhua'. Yosëichin ninarëhua'.
 Inaso' nanopiarin ni'ton, ya'ipi piyapi
 nicha'ëcaso' nohuanterin. Natëhuatëhua',
 anoyacancantatonpoa', nicha'ësaripoa'.

¹¹Nani a'chintëranquën ni'ton, inacha-
 chin api a'chinquë'. A'chinaton, pënëntëquë'
 natëina'. ¹²Co mashonquënhuë' niponahuë',
 noya pënëntëquë' mashoro'santa' natëi-
 nënquën. Ya'ipi piyapi'sa' noya nontëquë'.
 Nosoroaton, catahuaquë'. Cancanën quëran
 huarë' Yosë natëquë'. Sano yonquiaton,
 noyápiachin cancantëquë'. Noyasáchin
 niquë' imapisopita nonainëquënso marë'.
¹³Niyontonpachina', Yosë quiricanën nontë-
 quë'. Ina nontaton, pënëntëquë'. Quisocriso
 nanamën a'chintëquë'. Ca cancona'huarë'
 inapoquë'. ¹⁴Íraca ansiano'sa' niyontonahua-
 tona', acorinënhuën Yosë nanamën a'china-
 maso marë'. Së'huamotorahuatënënhuën,
 nanan quëtërinënhuën a'chinamaso marë'.
 Ina quëran Yosë catahuarinquën nóya a'chi-
 namaso'. Ama ina naniantaton, topinan
 ya'huëquësosohuë'.

¹⁵Yosë nanamën na'con yonquiaton,
 a'chináquë'. Ya'ipi cancanën quëran huarë'
 imaquë'. Ina quëran pënënpatan, a'napita
 noya ni'sarinënhuën. "Ma noya Yosëri
 catahuarin ni'ton, noya noya pënëntërin,"
 tosapi. ¹⁶Nani tahuëri yonquiquë' nóya
 imacamaso marë'. Naporahuaton, no'të-
 quën a'chinquë'. Inapohuatan, Yosë cata-
 huarinquën imamiataton cha'ëcaso marë'.
 A'napitanta' natanpachinquën, cha'ësapi.

**A'naya a'naya pënëncaso
 ya'huërinso'**

5 ¹Mashoro'sa' co noyahuë' nipa-
 china', ama no'huiquësosohuë'.
 Tata pochin nicaton, sanoanan quëran

pënénquë'. Napopináchin pi'ipitëramaso', iyaparin pochin ni'quë'. Inapitanta' nosoroaton, sanoanan quëran pënénquë'.²Sanapi'santa' pënénacaso' ya'huërin. Payaro'sa' nipachin, mama pochin nicaton, sanoanan quëran pënénquë' noya cancanchina'. Imoyaro'santa' napopináchin pi'ipitëramaso' oshiparin miáchin pochin ni'quë'. Ama inapita pi'pian tëranta' narintëquësohuë'. Noyasáchin yonquiaton, nontëquë'.

Quëyoronos'a' napopiso'

³Isonta' api, imapisopita sha'huitë-quë' nitochina'. "Quëyoronos'a' noyá sa'ahuamia nipachina', nosoroatoma' catahuaco," itëquë'.⁴Nipirinhüë', hua'-huinpita ya'huëtöhuachin, inapita pënén-quë' a'shina catahuaina'. Aminpitarinta' catahuaina'. Aso'sorin ni'ton, inahuarinta' i'huërétanta'ina'. Nosoroatona', nocomanta'ina'. Ina Yosë na'con nohuantërin.⁵A'naquën quëyoronos'aso nipirinhüë', co hua'huinpita ya'huëtërinhuë'. Yosëfchin yonquiarin. "Ina catahuarinco," ta'ton, nani tahuëri Yosë nontarin. Tashirë chachin nontarin. Inapitaso' catahuahua'.⁶A'naquën quëyoronos'aso nipirinhüë', nipa'yatacasoáchin yonquipi. Nanpia-ponahuë', chimipi pochin cancantopi. Co huachi Yosë yonquipihuë' ni'ton, co inapita catahuacaso' ya'huërinhuë'.⁷Nani api sha'huitëranquën. Ya'ipi imapisopita pënénquë' natëina'. Ama a'napitari pinocaiso marëhuë' noya niina'.⁸Quëmopinëna' tëhuëenchachin nosorocaso' ya'huërin. Pahuantöhuachina', catahuaina'. A'shina', pa'pina', hui'nin-pita, inapita na'con na'con nosorocaso' ya'huërin. Catahuaina', nocoma'ina'. Insoarisona co nocomahuachinahuë', co huachi Yosë natëapihuë'. Co quëmo-pinëna' nosoröhuachinarahuë', na'con na'con oshahuanapi.

⁹A'naya a'naya niyontonpique quëyoro-rono'sa' nininënpita ninshichina' catahuacaiso marë'. Payaro'saráchin acoina', saota shonca pi'ipitërinso'. A'naíchin so'yatërinso'.¹⁰Noya nininsoráchin aco'ina'. Iso pochin nipisopita: Hua'-huinpita noya aso'sorinso'. Ni'toro'sa' huë'pachinara, o'shitërinso'. Co manta' apirarinsöhuë'. Piyapinën pochin cancantaton, imapisopita catahuarinso'. Parisitopisopita nosororinso'. Noyasáchin nininso'. Ina pochin nipisopita aco'ina'.

¹¹⁻¹²Nanon quëyoronos'aso nipirinhüë', ama acoinasöhuë'. "Quisocriso marëá-chin sacatarahuë, co so'yantapöhuë'," taponahuë', oshaquëran ina naniantaton, naquëranchin so'yaantacaso' yonquiantapon nimara. So'yaantacaso' noya nipirinhüë', ma'sona Quisocriso sha'huitërinso' co naniantacaso' ya'huë-rinhüë'. Naniantöhuachin, ina marë' oshahuanarin ni'ton, ama inapitaso' acoinasöhuë'.¹³A'naquëonta' topinan ni'tapona' pa'sápatona', chiropi. Naporahuaton, ma'tona ma'tona nonsapi, pinotapi, co napocasöhuë' nipirinhüë'.¹⁴Napoaton nano'sa' so'inari ayanan-pihuachina', so'yanta'ina', tënahüë. So'yantatona', hua'huaanta'ina'. So'ina', hua'huinpita, inapita nocomahuachina', noya nisapi. Napöhuachina', co a'napitari pinosapihuë'.¹⁵Ni'quë' api. A'naquën quëyoronos'a' nani nisha cancantopi. Quisocriso a'porahuatona', sopai natëpi.

¹⁶Quisocriso imapatëhua', noya niahua'. Quëyoron quëmopinënpoa' ya'huëhuachin, canpoari chachin catahuahua' noya nanpicaso marë'. Ina quëran a'napita imapisopitarinta' sa'ahuamiaro'sarachin catahuaina'.

Ansiano'sa' nininso'

¹⁷A'naquën ansiano'sa' noya noya Yosë marë' sacatopi. Paatona', nani



tahuëri a'chinápi, pënéntápi. Inapita noya noya ni'co'. ¹⁸Yosë quiricanën quëran sha'huitërinpoa'. “Toro asacatohuatama', a'caco'. Trico i'nataton to'norayahuachin, ama tonpoanantocosohuë'. Tananpitoco' pi'pian pi'pian coshachin,” ténin. “Piyapi asacatohuatama', pahuërëco',” ténin anta'. Napoaton ansiano'sa' Yosë marë' sacatopi ni'ton, catahuaco'. Ma'sha quëtoco' ama pahuanchinasohuë'.

¹⁹Nanan natantohuatan, ama a'naroáchin natëquësohuë'. A'na piyapiriachin ansiano sha'huirapihuachin, co natëcaso' ya'huërinhuë'. Catoya'pihuë nipon, caraya'pihuë nipon, inachachin sha'huirapihuachina', naporo huarë' natëtëquë'.

Nisha nisha pënëntërinso'

²⁰Ansiano tëhuënychachin co noyahuë' nipachina, pënëncaso' ya'huërin. Ya'ipi imapisopita ayontonahuaton, chiníquën pënënuquë'. A'napitanta' të'huatatona', noya nicacaiso marë' pënënuquë'.

²¹Tata Yosë Quisocristorë chachin ni'sarinpoa'. Anquëniro'sa' acorinsopitanta' ni'sarinënpoa'. Napoaton api, ya'ipiya no'tëquën pënënuquë'. Ama a'naroáchin ana'intëquësohuë'. Noya natantëquë' no'tëquën nitotacaso marë'. Ina quëran no'tëquën yonquiaton, pënënuquë'. Inso tëranta' co noyahuë' nipachina, pënëncaso' ya'huërin. ²²Ansiano yaacohuatan, noya yonquiaton, oshaquëran acoquë'.

A'naroáchin acohuatan, co noyahué' nipachina, quémanta' na'ianan. Noya-sáchin niqué'.

²³Apira apira yacanioran ni'ton, ama api i'sharáchin o'oque'sohué'. Pi'pian huinonta' o'oque', aquëté' caniotan.

²⁴A'naquén co noyahué' nipachina, ya'ipi piyapi'sari nitotopi. "Inaso' oshahuanin. Ina maré' Yoséri ana'intarin," topi. A'naquénso nipirinhué' oshahua- naponahué', co a'naroáchin nitotè-rèhuahué'. Nipirinhué', co cancanén quèran imarinhué' ni'ton, oshaquèran nitotarihua'. ²⁵Inapochachin a'naquén noya nipachina, ya'ipi piyap'sa' nitotopi. A'naquénso' nóya niponahué', co a'naroáchin nitotèrèhuahué'. Oshaquè-ranchi inanta' nitotarihua'.

6 ¹Patron maré' sacatopisopita, pènénqué' patronéna' noya nica-tona' natéina'. Co natèhuachinahué', no'huitatona', Yosé pinopona' nimara. "Yosé nanaménso' napoonin ni'ton, ina imatona' co yanatèrinacohué'," taponá' nimara. Co ina Yosé nohuantèrinhué'. ²"Patronénanta' Quisocriso imapachin, ama ina maré' chiroinasohué'. Iyaparin pochin nicatona', noya noya sacachina'. Imarinsó' catahuarapi ni'ton, nóya sacachina'. Inanta' Yoséri nosororin ni'ton, noya catahuaina'," itèqué'. Ya'ipi carinquén pènènanquénso', a'chinqué'. Onpoptonta' pènénqué' natéina'.

Nonpin nanan a'china'piro'sa'

³Quisocriso no'tèquén a'chintèrinpoa'. Natèhuatèhua', noya noya cancantari-hua'. A'naquénso nipirinhué' Sinioro nanamén co natètonahué', nisha a'chinpi. Nonpin nanano'sa' a'chinapi. ⁴"Ya'ipiya nitotèrai," topirinhahué', co yonquipihué'. Topinan quèran nonsápi. Nisha nisha nanano'sa' yonquiatona', nonconpi. Pa'yatopi piyapi'sa' ano'huitacaiso'.

Inapita natanpachinara, niapiratopi, nino'huipi, nipinopi. "Nonpintèrinco nimara," ta'tona', co huachi natèrapihué'. ⁵Nitapicancantatona', co niqué'yapihué'. Iráca Yosé nanamén nitotopirinhahué', ina naniantatona', co huachi no'tè-quén yonquipihué'. Ma'sha canacaiso maré' Yosé yaimaconpi. Co ina maré' imacasohué' nipirinhué', napopi. Ama inapitaso' natanquèsohué'.

Canamiatèrèhuaso'

⁶No'tèquén Yosé imapatèhua', tèhuén-chachin canamiatarihua'. Co na'a ma'sha ya'huètopirinpoahué', sano cancantohuatèhua', nóya ya'huarihua huachi. ⁷Nasitohuatèhua', co manta' ya'huètèrinpoahué'. Naporahuaton, chiminpatèhuanta', ya'ipi ma'shanènpoa' patarihua'. ⁸Napoaton capacaso', a'mocaso' inapita ya'huètohuachinpoa', sano cancantahua'. ⁹A'naquénso nipirinhué' coriqui canacasoáchin yonquipi. Inasáchin cancantatona', sopai natèpi. Nani ma'sha nohuantatona' huénsonqué ma'sha manèso pochin nisapi. Inasáchin yonquiatona', aqué aquëté' nohuantapona'. Ina maré' Yoséri chiniqué' ana'intarin. ¹⁰Coriquiráchin pa'yatohuatèra, nisha nisha yonquiré'. Co noyahué' niné'. Nonpiné', ihuatèré', no'huitèré', ina pochin yonquiré'. A'naquén coriquiráchin yonquiatona', Yosé a'popi. Ina quèran cancanéna quèran co huachi noya cancantopihué'. Sètatona', chiniqué' parisitapi.

Imamiatacaso' ya'huèrin

¹¹Quémaso nipirinhué' api Yosé imaran ni'ton, ama coriquiráchin yonquiquèsohué'. Noya nicacasoá-chin yonquiqué'. Cancanén quèran huaré' Yosé chinotèqué'. "Inaso' nosoroatonco, catahuarinco," ta'ton,

noya natëquë'. Naporahuaton, ya'ipi piyapi nosoroquë'. Ma'sha onpoapohanuë', chiniquën cancantëquë'. Sano piyapi niquë'. ¹² Iráca imapisopita niyontonpachinara, chiniquën cancantaton, "Caso' Quisocristo imarahuë'," itëran. Napoaton "Yosë catahuarinco," ta'ton, sopai minsëquë'. Yosë nani huëntonënuë' aya'coninquën ni'ton, imamiatëquë'. Ina quëran a'na tahuëri inápaquë nanpimiataran. ¹³ Yosë chachin ananpirinpoa'. Inaso' ni'sarinpoa'. Quisocristonta' ni'sarinpoa'. Iráca inanta' chiniquën cancantaton, Ponsio Pirato no'tën nanan sha'huitërin. ¹⁴ Ina yonquiaton, Quisocristo noninso chachin natëquë'. Ama a'napita pino-caiso marëhuë' no'tëquën a'chinquë'. Siniro Quisocristo o'mantaquë huarë' noya natëquë'. ¹⁵ Tahuëri nanihuachin, Yosë nohuanton, o'mantararin. Yosëichin hua'anëntërinpoa'. Ya'ipi hua'ano'sa' ina natëina'. Copirnorosarinta' natëina'. "Ma noyacha Yosëso paya," ichina'. ¹⁶ Inasáchin co ta'huantarinhue'. Nanpirápon inaso'. Noya noya ni'ton, huënaráchin pochin ya'norin. Co ya'carichinachinhue'. Iráca quëran huarë' co insonta' Yosë quënaninhue'. Ipora huanta' co quënanarihuarahue', ya'ipi piyapi'sari chinochina'. Ya'ipiya nanitaparin. Amen.

¹⁷ A'naquën na'con coriqui ya'huëtërin. Inapitanta' api pënënuë': "Ama a'napita nocancosohue'. Ama coriquinëmáchin pa'yatocosohue'. Inaso' co ya'huëmiataponhue'. Yosë na'con na'con pa'yatoco'. Inaso' co apiratërinpoahuë'. Nani ma'sha quëtërinpoa' nóya cancantatëhua, ya'huëcaso marë'. ¹⁸ Na'a coriqui ya'huëtóhuachinquëma', a'napita nosoroatoma', catahuaco'. Ma'sha pahuantóhuachina, quëtoco'. Ama manta' apiracosohue'. Noya nico'. ¹⁹ Inapohuatama', Yosë'pa' canamiatarama'. Inaquë noya noya nanpimiatarama," itëquë'.

Tiquinamën pochin pënëninso'

²⁰ No'tëquën api Quisocristo nanamën a'chintëranquën. Ama naniantatonhue', noya imaquë'. Nonpin nanano'saso nipirinhue' ama natanquësóhuë'. Nisha nisha nonpi. "Ya'ipiya no'tëquën nitotërai," topirinhue', co no'tëquën nitotópihue'. ²¹ A'naquën nisha nanan imatona', Yosë a'popi. Ama inapita natëquësóhuë'.

Inaora nohuanton, Yosë noya catahuainquën. Nani ninshitëranquën huachi.

Paono